

# Sarajevo 100 onns suenter 1914

Occurrenza publica a Turitg ils 13 da mars

■ (gsc) **Ils 28 da zercladur 2014 vegn l'Europa a far endament il mazzament da prinzi ereditari Francestg Ferdinand e da sia consorta Sofia precis avant tschient onns, al «Vidovdan» (di da s. Vitus) dal chalender giulian.**

Quai è stà a Sarajevo, lezza giada chapitala d'ina Bosnia sut la curuna da Habsburg, cun in parlament da 37 commembers cristians ortodoxs, 29 islamics, 23 catolics ed in gidieu. Oz è Sarajevo la chapitala d'in stadi federal independent numnà «Bosna i Hercegovina» cun var 3,834 milliuns olmas (islam 45%, cristianissem ortodox 36%, catolicissem 15%); ses dus stadis federativs han num «Federacija Bosne i Hercegovine» (var 2,327 milliuns olmas, chapitala Sarajevo) e «Republika Srpska» (1 437 500 olmas, chapitala Banja Luka). La Bosnia ed Erzegovina ha ina riva da 20 km sper l'Adria e culminescha cun 2386 m al Piz Maglic sper il cunfin da Montenegro. L'Universitad da Sarajevo («Centar za Ljudska Prava») ha mess ad ir in partenadi instituziunal cun quella da Turitg ed il Fond naziunal svizzer, en il rom dal Scopes («Scientific Cooperation between Eastern Europe and Switzerland»), davart il tema: «Memory, History and State-Building in Bosnia-Herzegovina». Il Seminari filosofic da l'Universitad da Turitg arranscha in'occurrenza publica da lez partenadi la gievgia, ils 13 da mars 2014 da las 18.15 a las 19.45 en il bajetg principal, Rämistr. 71, sala KOL E 18 (1). L'emprim referescha Dino Abazovic (Universitad da Sarajevo) davart il passà proxim ed il futur da ses pajais: «Facing the Past. Consequences for the Future.» Il politolog Abazovic è spezialist dals dretgs umans e da la sociologia da la religiun. La schlatta «Abazovic», cun il tschep arab «abaz-», tradescha ina derivanza islamica.

## In tschientaner da genocidis

A las 19.00 suonda ina maisa radunda fitg empermettenta: «Memory Politics, Political Mobilization and the Role of Academics». Abazovic ed autras personas exper-

tas debattan davart la noziun da genocidi e la giustia penala internaziunala, cunzunt en connex cun las guerras dals onns novanta en l'anteriura Jugoslavia. Isabel Delpla (Universitad da Montpellier) ha perscrutà spezialmain l'andament dal process da Jerusalem cunter l'anterieur «SS-Obersturmbannführer» Adolf Eichmann (1906–1962). La discussiun vegn manada dal doctorand da politologia Adis Merdzanovic, collavuratur dal post da lavur e perscrutaziun eticas da l'Universitad da Turitg. La questiun etica e giuridica dal genocidi è puspè vegnida actuala cun ina decisiun dal Tribunal europeic dals dretgs umans (Tedu, Strassburg), ils 17 da december 2013, che ha mess en dumonda lezza noziun. L'Institut internaziunal da perscrutaziun dals genocids e dals dretgs umans (2) scriva en in inserat publicità en la «NZZ» dals 6 da mars 2014, p. 4: «Il Tedu ha cumpilà davart il genocid armen decleraziuns ordvart contestablas che surpassan lunschora l'incumbensa u la cumpetenza d'in tribunal (...). Igl è evident ch'el n'enconuscha betg la quantad imposanta da cumprovas publicitadas; dentant ha'l mess en dubi la vardad istorica da lez genocid.» Ils 16 da favrer 2014 ha ina grupp da persunas expertas scrit ina brev averta a cuss. fed. Simonetta Sommaruga: «Nus essan preoccupads da tscherts puncts da l'argumentaziun ch'il tribunal dovra per giustifigar sia sentenza; lezs puncts èn incumpatibels cun las notizias istoricas davart il genocid armen da 1915.» Tranter ils firmataris da la brev stat l'istoricher Hans Lukas Kieser (Universitad da Turitg; v. La Quotidiana dals 28 da matg 2009, 11 da matg 2011 e 26 da mars 2013). L'occurrenza dals 13 da mars 2014 fa puspè endament ch'il tschientaner passà è stà davairas in tschientaner da genocidis. E co statti cun il noss, cun «l'indifferenza globalisada» (papa Francestg) a Lampedusa, Melilla ed utrò?

1. Contact: [sylvie.ramel@philos.uzh.ch](mailto:sylvie.ramel@philos.uzh.ch)  
2. Addressa: 255 Duncan Mill Rd., Suite 310.  
Toronto, ON, Canada M3b 3H9.  
Internet: [www.genocidestudies.org](http://www.genocidestudies.org)